

Kalata gwa búbili ugwa Paúli ku Bakolinti Isyakulongosya

Kalata ujú, Paúli aabasimbiile aBakilisiti aba bali mu Kolinti. Kaali kaaja kanywamu nkiisú ikya mu Akaja mBúgiliki. Aasimbile bo aali kifuki ukubendela. Kalata ujú aali gwa kubakasya, paapo jo ujú aalyandi- isye ikipanga kya Kyala ikya mu Kolinti. Bo akaali ukusimba kalata ujú, kunyuma aabendela nú kubatumila baakalata, leelo bwalipo ubutolwe ubwa kulegana ndwitiko nkipanga ikyo. Po alinkusimba kalata ujú, ukubatúla ukutendekesya bo akaali ukufika ku Kolinti.

Sikunangisya ukuti aBakilisiti bamo baatigi Paúli akaabombelaga kanunu indalama sya kipanga, kangi baatigi akaja ntumigwa gwa nalooli. Po mwa kalata ujú ikulingaania ukuti umwene jo jwani, kangi ikulingaania isya mbombo ijaa kulumbilila indumi inunu, iji Kyala aalinkooliile ukulumbila. Kangi ikubamanyisya abiitiki ukubombela indalama syabo, ukubatúla aBakilisiti ni fipanga fyosa ifya Kyala.

Isi silimo mwa kalata uju

Pauli ikubaponia aBakolinti nu kugwa ulupi kwa Kyala

Pauli ikwinokesya ulubaatiko lwake nu kulingaania imbom

Ukubasangulila abiiitiki abaa ku Jelusalemu

Pauli ikubalingaania ukuti umwene ntumigwa gwa Jesu Kil

Isya kumaliikisya ukubasoka

Uluponio

¹ Kalata uju afumile kumyangu une Pauli, ne ntumigwa gwa Kilisiti Jesu, ku bwigane bwa Kyala. Une nu gwamyitu ndwitiko Timoti tukubasimbila umwe mwe baa nkipanga kya Kyala iki kili mu Kolinti, pamopeene na biitiki boosa aba bali nkiisu ikya mu Akaja.

² Hiiipyana nu lutengaano ukufuma kwa Taata Kyala na ku Ntwa Jesu Kilisiti, fijege na nuumwe.

Ulusuubisyo lwa Kyala mbutolwe

³ Atuufigwege Kyala, uGwise gwa Ntwa gwitu Jesu Kilisiti, Taata ugwa kibabiilisi, kangi jo Kyala uju ikutusuubisya ndi syosa.

⁴ Umwene ikutusuubisya mbutolwe bwitu boosa, ukuti na nuuswe tubasuubisyege abangi aba bali mbutolwe, ukwendela ndusuubisyo lula ulu atupeele Kyala uswe.

⁵ Po leelo, bo ulu Kyala ikongelapo ubuliilanisi ubu tuli nabo mu ngubilo sya Kilisiti, bo lululo ikongelapo ukutusuubisya ukwendela mwa Kilisiti.

⁶ Nalinga tukukubilwa, tukukubilwa ukuti umwe mukabe ulusuubisyo nu bupoki. Kangi bo tukusuubisigwa, tukusuubisigwa ukuti

umwe mukabe ulusubisyo. Ulusubisyo uo lukubapela ukumiilila mu ngubilo silasila, isi na nuuswe tukukubilwa.

⁷ Ulusubilo lwitu kumyinu lukulamba, paapo tumeenye ukuti muli baliilanisi mu ngubilo syitu, kangi muli baliilanisi ndusubisyo lwitu.

⁸ Baamyitu ndwitiko, tukulonda mumanye muno twakabiile ingubilo ingali, bo tuli nkiisu ikya Asija. Ingubilo isi syatwagile syatwilikiile fiijo, twinogonaga ukuti tukuja pakufwa.

⁹ Nalooli twali bo ulwa bandu aba balongi-igwe ukugogigwa. Leelo ilyo lyaboniike, ukuti tuleke ukusubila amaka giitu jujuswe, looli tansubilege Kyala uju ikubasyusa abafwe.

¹⁰ Umwene jo uju aatupokile bo tuli mbutolwe ubwa kufwa, kangi ikwendelelaga ukutupoka. Uswa tukusubila umwene ukuti ikubombaga bo uo akabalilo koosa,

¹¹ ku njila jinu ukututuula, mu nyiipuuto syinu kwa Kyala. Po Kyala aikupilika inyiipuuto syinu, nu kutupa isajo inyingi. Po abandu bingi aabikunngwila ulupi.

Pauli ikwandula ulubaatiko lwake ulwa kubuka ku Kolinti

¹² Po tukwituufya ndi ili, tukwibona mu ndumbula syitu ukuti pakiisu apa, fiijo kumyinu, twatugeele ku bugolofu, kangi ni ndumbula inyeelu ukufuma kwa Kyala, kisita busyobi. Tukaasubilaga amahala giitu jujuswe, looli ipyana lya Kyala.

¹³⁻¹⁴ Ndi ilyo tutikubasimbila amasyu amakafu, looli aga mubagiile ukubala nu kugaania kanunu. Akabalilo aka mutwageenie panandi,

ngusubila ukuti iisiku limo aamukwisa kusyagania syosa. Po iisiku ili ikwisa kugomoka uNtwa Jesu, mukwisa kwituukifyaga mmyitu, bo ulu uswe tukwituukifya mmyinu.

15 Paapo naameenye ukuti mukwituukifya mmyitu, naalondaga ukutala ukwisa kumyinu, ukuti muhoboke fiijo kunongwa jaa kwisa une ulwa bubili.

16 Naabaatiike ukwenda kumyinu bo ngubuka nkiisu ikya mu Maketonija, nu kugomokelako kangi kumyinu, ukuti umwe mumbepo ubutuuli ubwa njila jangu ijaa kubuka nkiisu ikya Jutai.

17 Po bo nandwile ulubaatiko lwangu ulwa kwisa kumyinu, bale, mukwinogona ukuti ngwanduka anduka? Pamo mukwinogona ukuti une ngulongosigwa nu bwigane bwangu, ukuti ndigi, "Eena," po kangi akabalilo kakaako ndigi, "Himma!"

18 Looli bo ulu Kyala gwa bwanalooli, isi twababulile sitikwanduka anduka, ukuti, "Eena," po kangi ukuti, "Himma."

19 Namanga uMwana gwa Kyala,* Jesu Kilisiti, akaali mundu gwa kongaania amasyu, ukuti atigi, "Eena," po kangi atigi, "Himma." Looli umwene akabalilo koosa jo, "Eena." Umwene jo uju une, Sila na Timoti twalimfumwisye kumyinu.

20 Umwene jo, "Eena," ugwa kunangisya isi aafingile Kyala. Jo nongwa iji mwa Jesu Kilisiti tukuti, "Ameni," ukuntuufya Kyala.

* 1:19 1:19 *uMwana gwa Kyala* Bala ku isyakulingaania.

²¹ Kyala jo ujũ ikutukasya uswe na nuumwe, kangi atusungwile ukũja biitiki baa Kilisiti,

²² atubiikile ikikolekelo, kokuti abiikile pamyitũ ikimanyilo ikya kunangisya ukuti tuli bandũ baake. Ikikolekelo ikyo jo Mbepo Mwikemo ujũ Kyala ammbiikile mu ndumbula syitũ, ukuti tumanye kisita kwilaamwa, ukuti isi afingile aasikuboneka.

Paũli akaagomokiileko kũ Kolinti

²³ Ngaaliisile kangi kũmyinu, uko kũ Kolinti, paapo ngaalondaga ukubafulasya mu ndumbula syinu. Isi ngũjoba sya nalooli, Kyala nkeeti gwangũ.

²⁴ Ndikuti tuli balagili baa lwitiko lwinu, looli tukwikasya ukũja baliilanisi na nuumwe, ukuti tũje nũ lusekelo. Namanga umwe muli na maka ndwitiko.

2

¹ Po naatumwile mu ndumbula jangũ, ukuti ndikwisako kangi kũmyinu, ndingabafulasya indumbula syinu.

² Paapo linga une ngubapela umwe ukũja nũ busulumanie, kokuti akajako ugwa kumbela une ukũja nũ lusekelo, looli jũjũumwe mwe mbafuleesyey mu ndumbula syinu!

³ Fyobeene naabasimbiile mwa kalata jũla ujũngi, paapo ngaalondaga ukwisa kũmyinu, ukuti ndingafulasigwa mu ndumbula jangũ na bandũ aba baalondigwaga ukũhobosya. Naameenye ukuti une linga ndi nũ lusekelo, na nuumwe aamukũja nũ lusekelo.

4 Naabasimbiile kalata ku busulumanie ubukulumba, ubutolwe na maasosi. Ngaabingiliile ukubafulasya mu ndumbula syinu, looli ukuti mumanye muno mbaganiile fiyo.

Ushobokelo ku ntulanongwa

5 Po leelo, umundu pakati pamyinu uju aaliifuleesye fiyo, akaaliifuleesye niimwene, looli abafuleesye umwe mwesa. Leelo ndikulonda ukukindilila ukujoba isyo.

6 Uufundo uku akabile ukufuma ku bandu bingi, lumfwene.

7 Po kununu ukunhobokela nu kunkasya umundu ujo, ukuti alingasulumania fiyo nu koonyoka amaka.

8 Ngubapyelesya mujobe pawelu ukuti mukaali munnganile.

9 Fyobeene naabasimbiile kalata jula ukubapima, ukuti manye linga mukumbilika ndi syosa.

10 Linga mukunhobokela umundu ujo, na niine ngunhobokelaga. Linga silipo isya kunhobokela, nunhobokiile nkyeni mwa Kilisiti kunongwa jinu,

11 ukuti Seetano alingatutola, paapo tubumeenye fiyo ubukomu bwake.

Paali nkaaja akaa mu Tiloja

12 Po bo mfikile nkaaja akanywamu akaa mu Tiloja, kukulumbilila indumi inunu ijaa Kilisiti, naalyagile ikifigo kiigwike, ukuti mbombe imbombo jaa Ntwa kula.

13 Leelo ngaali nū lūtengaano mu ndumbula, paapo ugwamyitū ndwitiko Tiiti, akaali ukufika ni nongwa simo inunu ukufuma kumyinu. Po ndinkubalaga abandu baa kula, ndinkubuka kula kukiisu ikya Maketonija.

Ukutola ku maka agaa Kilisiti

14 Looli tunngwilege ulupi Kyala! Mwa Kilisiti ikutulongosya akabalilo koosa, bo ulwa ntoli ujū ikubalongosya abandu aba abakolile mbwite. Kangi bo ulwa lumu ulununu ulu lukubalanila koosa, ikutupela uswe ukubalania ubumanyi bwa Kilisiti mbujo boosa.

15 Namanga kwa Kyala tufwene nū lumu ulununu ulu lukumfikisya Kilisiti ku bandu boosa, kuli aba bikupokigwa, kangi kuli aba bikusoba.

16 Kuli aba bikupokigwa, ulumu ulu lununu, lukubapa ubumi. Looli kuli bala bikusoba, ulumu ulu lūbiibi, lukubapa ubufwe. Bule, alipo umundu gwesa ujū abagiile ukubomba imbombo ijo?

17 Baliko abandu bingi abasyobi, aba balibikile iisyū lya Kyala ngati kandu kaa kulisya. Uswē tūlegeene nabo. Looli mwa Kilisiti tutumiigwe na Kyala, tukufumusya iisyū lya Kyala ku bwanalooli.

3

Ababombeli abaa lwitikano ulupya

1 Kali mukwinogona ukuti twandile kangi ukwituufya? Himma, uswe tukaja bo abandu abangi, aba bikutwala kumyinu baakalata,

ukwilingaania muno bajiiliile, pamo ukusuma kumyinu baakalata, abaa kutulingaania muno tajiiliile ku bandu abangi.

² Umwe jo kalata uju ikulingaania muno tajiiliile, uju asimbiigwe mu ndumbula syitu, uju abandu boosa babagiile ukubala nu kusimanya isi tukubomba.

³ Mukunangisya ukuti umwe jo kalata ukufuma kwa Kilisiti. Kalata uju ikunangisya imbombo isi tubombile kumyinu. Akafwana na kalata uju asimbiigwe ni simbilo, looli asimbiigwe na Mbepo gwa Kyala uMuumi. Kangi mukaja bo kalata uju asimbiigwe pa mabwe, looli uju asimbiigwe mu ndumbula sya bandu.

⁴ Po tutikwilaamwa na panandi nkyeni mwa Kyala ndi isyo, kunongwa jaa isi atubombiile Kilisiti.

⁵ Tutikwinogona ukuti tubombile simo ku maka giitu, looli amaka aga gikufuma kwa Kyala gabombile syosa.

⁶ Umwene jo uju atupeele amaka agaa kaja babombeli abaa lwitikano ulupya,* ulu lutikufuma mu ndagilo isi silimo mmasimbo, looli lukufuma kwa Mbepo Mwikemo. Namanga amasimbo gaa ndagilo gikutwala ubufwe, looli Mbepo Mwikemo ikutwala ubuumi.

Ubasisya bwa lwitikano ulupya

⁷ Indagilo sya Moose isi syasimbiigwe pa mabwe, syatwele ubufwe. Syaliisile nu basisya nu kulangala, mpaka aBanyaisilaili baatoliigwe

* **3:6 3:6 Ulwitikano ulupya** Bala iisya **Ulwitikano** ku Isyakulingaania.

ukunkeeta Moose kumaaso, paapo kwalangalaga fiijo, na paapo kaali kabalilo kapimba itolo.† Po linga imbombo jaa luko ulo jaaliisile nu busisya, ⁸ bale, imbombo jaa Mbepo Mwikemo jitikukindilila ukuja nu busisya?

⁹ Linga imbombo jila ijaa ndagilo, iji jaapelile abandũ ukulongigwa jili nu busisya, po imbombo jaa Mbepo Mwikemo, iji jikupela abandũ ukuja bagolofu nkyeni mwa Kyala, bale jitikukindilila ukuja nu busisya?

¹⁰ Elwitikano lala ulwa kwanda lukaali nu busisya kangi, ukubufwanikisya nu busisya ubukulamba fiijo ubwa lwitikano ulupya, ubu bukindile ubusisya boosa.

¹¹ Linga aka kaakulupaga kaali nu busisya bwake, po ubusisya bwa aka kikujako bwila na bwila kikukindilila ukuja nu busisya.

¹² Paapo ulo lo lusubilo lwitu, tukubomba imbombo kisita kutiila.

¹³ Kangi tutikubomba bo ulwa Moose, uju aaliikingile kumaaso ni kitambala, ukuti aBanyaisilaili balingankeetaga bo ukulangala kukulogotela.

¹⁴ Looli amahala gaabo gaaliigaliigwe. Mpaka ulu, bo bikubala baakalata abaa ndagilo sya Moose, amahala gaabo gakingiigwe ni kitambala, bikutoligwa ukusyagania. Ikitambala kyabo kikaali ukusoosigwa, paapo Kilisiti mwene jo abagiile ukukisoosyapo ikitambala ikyo.

¹⁵ Nalooli mpaka ulu, bo bikubala baakalata abaa ndagilo sya Moose, indumbula syabo

† 3:7 3:7 Bala kalata gwa Ukusooka 34:29-30.

sikupikiliigwe, bikutoligwa ukusyagania.

¹⁶ Looli umundu uju ikusanukila ku Ntwa, uNtwa ikunsookesyapo ikitambala kyake.

¹⁷ Iisyu ilyo, “Ntwa,” kokuti, “Mbepo.” Apa alipo Mbepo gwa Ntwa pali nu bwabuke.

¹⁸ Po twesa, twe tukulangala ubusisya bwa Ntwa, paapo atusoosiisyepo ikitambala kumaaso, tukwanduligwa ukuti tufwane nagwe. Tukwanduka ukufuma mbusisya, ukuti tujege mbusisya ukukulumba ubu bukindiliile, ubufuma ku Ntwa, uju jo Mbepo.

4

Amaka gaa Kyala ntundu utwa mfu

¹ Po Kyala ku kibabilisi kyake atupeele imbombo iyi, tutikoonyoka amaka.

² Tukaanile loosa ukubomba kubutiitu ingosya soni, ukubasyoba abandu nu kongania iisyu lya Kyala ni sya butungulu. Looli tukujoba ubwanalooli pabwelu, ukuti abandu boosa bamanye mu ndumbula syabo ukuti tukaja basyobi nkyeni mwa Kyala.

³ Looli linga iNdami iNunu iyi tukufumusya jifisiigwe, jifisiigwe kwene kuli aba basobile.

⁴ Seetano, uju jo lyakyala lya pakisu apa, abapupeesyeye inyiinogono syabo abandu aba batikummwitika Jesu, ukuti batoligwe ukulubona ulumuli lwa Ndami iNunu ijaa busisya bwa Kilisiti, uju jo kifwanikisyo ikya Kyala.

⁵ Namanga uswe tutikufumusya inongwa syitu, looli tukufumusya inongwa isya Jesu

Kilisiti, ukuti jo Ntwa, nu kuti uswe tuli babombeli biinu ku njila jaa kummbombela Jesu.

⁶ Tukubomba bo ulo paapo Kyala, uju aatile, “Ulumuli lumulike mu ngiisi,”* jo uju ikumulika indumbula syitu, ukuti tubumanye ubusisya bwake ubu bukulangala kumaaso kwa Jesu Kilisiti.

⁷ Pamopeene na isyo, amahala ago amakulumba gafwene bo ikyama iki kibiikiigwe mu ngumbe isya mfu. Po abandu bikumanya ukuti amaka giitu agaa kubomba imbombo ijo, gatikufuma kumyitu, looli gikufuma kwa Kyala.

⁸ Tuli mbutolwe kuno na kuno, looli tutikutoligwa. Tukwilaamwa, looli tutikoonyoka amaka.

⁹ Abandu bikutukaga, looli Kyala atikutuleka twibeene. Tukubigigwa, looli tutikugogigwa.

¹⁰ Amasiku goosa imibili gyitu gili mbutolwe ubwa kugogigwa, bo ulu aagogiigwe Jesu, ukuti ubuumi bwa Jesu baboneke mmibili gyitu.

¹¹ Namanga uswe twe buumi, akabalilo koosa tuli mbutolwe ubwa kufwa, kunongwa jaa kubomba imbombo jaa Jesu, ukuti abandu babubone ubuumi bwa Jesu mmibili gyitu, nalinga imibili gyitu aagikufwa.

¹² Po uswe tuli mbutolwe ubwa kufwa, looli umwe mukakaba ubuumi.

¹³ Uswe nuuswe tummwitiike Kyala, bo ulwa mundu jula uju aajobile mwa Kalata uMwikemo, aatile, “Naalimmwitiike Kyala, fyobeene naajobile.”† Bo lululo, uswe tummwitiike. Fyobeene

* **4:6 4:6** Bala kalata gwa Ubwandilo 1:3. † **4:13 4:13** Bala kalata gwa Isabuli 116:10.

tukujoba.

¹⁴ Po tukujoba pabwelu, paapo tumeenye ukuti Kyala ujū aalinsyusiisye uNtwa Jesu, ikwisa kutusyūsyūya uswe, ukuti na nuuswe tujeye pamopeene nagwe. Kangi ikwisa kutubiika pamopeene na nuumwe nkyeni mmyake.

¹⁵ Ingubilo isi syosa isi tukwambilila sikubapa ukukabamo, ukuti iipyana lya Kyala libafikile abandū abingi. Po bikunngwilaga ulupi fijo Kyala, nu kukindilila ukummwimika.

Ubasisya bwa bwila na bwila

¹⁶ Po tutikoonyoka amaka, nalinga imibili gyitu gikukulupa, looli nkati mmyitu Kyala ikutupela ukujā bapya kukuti isiku.

¹⁷ Namanga ubutolwe bwitu bupepe, kangi bwa kabalilo akapimba itolo. Ubutolwe ubo, bukutatendekesya ubasisya ubwa bwila na bwila, ubukulumba fijo ukukinda ubutolwe bula.

¹⁸ Po tukufilulalila ifi fitikuboneka, fyomma ifi fikuboneka, paapo ifi fikuboneka fya kabalilo akapimba itolo, looli ifi fitikuboneka fya bwila na bwila.

5

Ukuguulila imibili imipya ukufuma kwa Kyala

¹ Tumeenye ukuti imibili gyitu kitembe kya kabalilo akapimba nkiisu muno. Looli bo kiisile kupanguka, Kyala ikwisa kutupa imibili imipya kumwanya, bo ulwa nyumba ijaa bwila na bwila, iji jikajengigwa na bandū.

² Namanga mbũumi ubũ, indumbula syitũ sikũtaamigwa. Ndi ilyo tukũnyonywa fiijo ukũfwikigwa imibili imipya kũmwanya, igi syo nyumba syitũ imbya.

³ Kyala bo atũfwikile, tũtikwisa kũjaga kisita mibili.

⁴ Bo tũkaali tũli nkitembe iki ikya kabalilo akapimba, tukũtaamigwa mu ndumbula syitũ, tukũtwikigwa ifitwalo ifisito. Tũtikũti tukũlonda kwene ukũfuula umbili ugũ gukũfwa, looli tukũlonda ukũfwikigwa umbili ugũ gutikũfwa, ukũti umbili ugũ gukũfwa gumiligwe na ugũ gutikũfwa.

⁵ Kyala jo ujũ atũtendekekiisye isyo, atũpeelee Mbepo gwake, ukũti tũmanyeye kisita kwilaamwa ukũti isyo sikwisa kuboneka.

⁶ Po akabalilo koosa, tũtikwilaamwa. Kangi tũmeenye ukũti, akabalilo aka tũli ni mibili igi pakiiisũ apa, tũli kubũtali nũ Ntwa.

⁷ Tukwendela ndwitiko, somma ndi ifi fikuboneka.

⁸ Po tũtikwilaamwa, kangi tukwaga kwali kũnunu ukũguleka umbili ugũ, tũkatũugalege nũ Ntwa.

⁹ Po leelo, tũje mbũjo ubũ, pamo tũlingaja mbũjo ubũ, inyango jiitũ ko kũnkyela nũ Ntwa.

¹⁰ Namanga uswe twesa tukwisa kwima nkyeni mwa Kilisiti, nũ kũlongigwa nagwe, ukũti kukũti mundũ iise ambulile umfwalo ukũkongana na isi abombile pakiiisũ apa, sije nunu pamo sije mbiibi.

Uubombeli bwa kubafumukisya abandũ isya kubafwania na Kyala

11 Paapo tumeenye ukuntiila unTwa, po tukwikasya ukubapyelesya abandu ukuti bammwitikege. Kyala atumeenye fiijo muno tujiliile, na niine ngusubila ukuti nuumwe mutumeenye fiijo.

12 Tutikalonda ukwituufya kangi kumyinu, looli tukalonda ukubabwala isyo, ukuti mwituukifye isi tukubabombela. Po mujege na masyu agaa kubaamula aba bikwituukifya isi babobile nkyeni mmbandwa, somma muno bajiliile mu ndumbula.

13 Linga abandu bikuti uswe tuli ni kigili, tuli nakyo mwene nkyeni mwa Kyala. Linga tuli na mahala, tuli nago kumyinu.

14 Ulugano lwa Kilisiti lukutulongosya na maka, namanga tumeenye ukuti, umundu jumo aabafwiliile abandu boosa ukuti bahobokeligwe ubutulanongwa bwabo. Kunongwa ijo ubundu bwabo ubwa ijolo bufwile pamopeene nagwe.

15 Aabafwiliile abandu boosa, ukuti baleke ukwendela mbwigane bwabo, looli mbwigane bwa ujw aabafwiliile nu kasyuka.

16 Po ukufuma akabalilo aka, tutikummbona umundu najumo bo muno abandu abaa nkiisu bikummbonela. Akabalilo kamo twankeetaga Kilisiti bo ulo, looli akabalilo aka tutikubomba bo ulo.

17 Umundu gwesa ujw alungeene na Kilisiti, ikuja kipeligwa kipya. Isya ijolo sikindile. Keeta, siisile imbya!

18 Looli syosa isyo sikufuma kwa Kyala, ujw atufwenie uswe nu mwene, ukwendela mwa Kilisiti. Uswe atupeele imbombo ijaa

kubanangisya abandũ injila jaa kubafwania nũ mwene.

¹⁹ Kokuti Kyala, ukwendela mwa Kilisiti, aabafwenie abandũ nũ mwene, kisita kubala ubutulanongwa bwabo. Kangi Kyala atupeele uswe imbombo jaa kubafumukisya abandũ isya kufwania uko.

²⁰ Po uswe tuli ni Ndũmi jaa Kilisiti. Kokuti, ukwendela mmyitu, Kyala ikubasisimikisya ukufwana nagwe. Fyobeene tukubasũma fiijo ku bulagili bwa Kilisiti ukuti, mufwane na Kyala.

²¹ Kilisiti akaali nũ butulanongwa, looli Kyala aalimmbiikile ngati ntulanongwa, ukuti ku njila jaa kulungana na Kilisiti, tũjege mbũliilani na Kyala mbũgolofu bwake.

6

¹ Paapo tukubomba pamopeene na Kyala, tukubapyelesya ukuti iipyana lyake ili mwambiliile, mulingalisobesya.

² Namanga Kyala ikuti,
 “Pakabalilo akanunu naakupiliike,
 pi isiku lya bupoki naakutuulile.”*

Po nikubabũla umwe nikuti, akabalilo akanunu ko aka, iliisiku lya bupoki lyo ili!

Ukũtaamigwa kwa Paũli bo ikubomba imbombo jaa Ntwa

³ Tũtikubomba nakamo, aka kikufulasya mu ndumbula sya bandũ, ukuti ububombeli bwitu bulingajobigwaga kabiibi.

* 6:2 6:2 Bala kalata gwa Jeesaia 49:8.

4 Looli ndi syosa tukwinangisya ukuti tuli babombeli baa Kyala. Tukwikasya fiijo mu ngubilo na mbutolwe ubwingi.

5 Akabalilo kamo tukukomigwa, tukupinyigwa mu nnyololo, tukoobeligwa, tukubomba imbombo ingafu, tukugona maaso, tukulinda ni njala.

6 Leelo tukubomba syosa isyo ku bugolofu, mbumanyi, mbutengamojo, mbooloolo, nkulongosigwa na Mbepo Mwikemo, ndugano ulusita busyobi,

7 kangi ku njila jaa kulumbilila indami jaa nalooli, ku maka agaa Kyala. Ubugolofu kyo kilwilo kyitu, iki tukukola mmaboko giitu ku kiiliilo na ku kiimama.

8 Uswa tukwikasya fiijo, abandwa batwimike pamo batufujule, batutuufye pamo batujobe kabiibi. Tukujobigwa ukaja batungula, looli tukujoba isya bwanalooli.

9 Tukufwana tukaja bafumuke, looli tuli bafumuke fiijo. Tukufwana tufwile, looli tuli buumi. Tukomiigwe fiijo, looli tutikugogigwa.

10 Kangi tuli nu busulumanie, looli akabalilo koosa tuli nu lusekelo. Tuli balondo, looli bingi tubapeele ubakabi. Tukaja nafyo nafimo, looli tuli nu tundu toosa.

11 Mwe Bakolinti umwe, tujobile na nuumwe kisita kufinda nakamo, kangi tujobile ku lugano ulukulumba.

12 Uswa tukaleka ukubagana umwe, looli umwe mulekile ukutugana uswe.

13 Po ngujoba na nuumwe ngati ngujoba na baanangu, muje nu lugano fiijo bo muno tujiliile

uswe.

Ubuliilanisi na bandu aba bakaja biitiki

¹⁴ Mulingajaga baliilanisi na bandu aba bakaja biitiki. Bule, ubugolofu nu butulanongwa fibagile ukuliilanila? Bule, ulumuli ni ngiisi fifwene itolo?

¹⁵ Bule, Kilisiti abagiile ukwitikana na Seetano? Bule, umwitiki abagiile ukaja ndiilanisi na ujua akaja mwitiki?

¹⁶ Bule, itempeli inyiikemo ijaa Kyala, jibagiile ukaja nu tundu utu tukaja twa Kyala? Namanga jo uswe twe tuli tempeli jaa Kyala uMuumi! Bo ulu Kyala aajobile ukuti,

“Ngutuugalaga mmyabo,
nu kwenda pamopeene nabo.

Ngujaga ne Kyala gwabo,
boope bikujaga bandu bangu.”†

¹⁷ Kunongwa ijo, uNtwa Kyala aatile,

“Musookepo pakati pamyabo,
mwipaagule!

Mulingakolaga akandu akanyali!

Po na niine angubambilila.”‡

¹⁸ Kangi uNtwa Kyala uMwene maka goosa aatile,

“Ngujaga Gwiseemwe,
umwe mukujaga baanangu abanyambala,
na baanangu abakiikulu.”§

† **6:16 6:16** Bala kalata gwa Abanyaleebi 26:12; Jelemija 32:38; Esekyeli 37:27. ‡ **6:17 6:17** Bala kalata gwa Jeesaaja 52:11.

§ **6:18 6:18** Bala kalata gwa 2 Samweli 7:14.

7

¹ Bakundwe, paapo Kyala aafingile isyo syosa, twijeelusye, tulingaja nako nakamo aka kabagi-ile ukutunyasya umbili ni ndumbula, ukuti taje biikemo fiijo ku njila jaa kantiila Kyala.

Paali ali nu lusekelo kunongwa jaa kipanga kya Kyala

² Mutwambilile mu ndumbula syinu! Tukatula inongwa ku mundu najamo. Tukamfulasya umundu najamo. Tukansyoba umundu najamo.

³ Ndikujoba amasyu aga ukubalanga. Bo ulu njobile kubwandilo, umwe muli mu ndumbula syitu, taje pamopeene bo tali ku buumi pamo tufwe pamopeene.

⁴ Bo ngujoba na nuumwe ngaja nu lutende. Kangi ngwituukifya umwe. Muusubisiye fiijo. Na paapo tukufundigwa ni ngubilo inyingi, mumbelile ukaja nu lusekelo ulunywamu.

⁵ Bo tufikile kula ku Maketonija twatoliigwe ukutuusya, paapo twali ni ngubilo koosakoosa. Panja kwali nu bwite, nkati mu ndumbula syitu mwali nu lutende.

⁶ Looli Kyala uju ikubasubisiya aba boony-wike amaka mu ndumbula syabo, aatusubisiye ku njila ijaa kwisa kwa Tiiti.

⁷ Kukaja kokuti twasubisiigwe na Tiiti mwene, looli loope nu lusubisiyo ulu aasubisiigwe na nuumwe. Aatupangiile muno musyukilwe ukumbona, ni sya busulumanie bwinu, nu kwijwala kwinu kunongwa jangu. Isyo simbeliile ukusekela fiijo.

⁸ Nalinga naabapeliile ubusulumanie na kalata uju naabasimbiile, sitikummbaba. Nalinga syaliimbabile panandi kubwandilo, kalata ujo aabapeliile ubusulumanie kukabalilo akanandi itolo.

⁹ Looli lilino ndi nu lusekelo. Bule, paapo mbatwaliile ubusulumanie? Himma! Looli paapo ubusulumanie bwinu bubapelile ukupinduka ukufuma mbutulanongwa bwinu. Ubusulumanie bwinu bwali mbwigane bwa Kyala, uswe tukaabafuleesyepo ku njila jojoosa.

¹⁰ Linga Kyala ikutupela ukuja nu busulumanie, bukutupela ukupinduka nu kupokigwa. Ubupokigwa ubo butikututwalila ubusulumanie. Looli ubusulumanie ubu bukufuma pakiisu apa bukutwala ubufwe.

¹¹ Keeta! Ubusulumanie ubo ubwa kufuma kwa Kyala, bubatwaliile ukukabamo fiijo. Po mukunyonywa fiijo ukwinosya, ukubukalalila ububiibi, ukummwimika Kyala, ukusyukwa, ukwijwula ukubomba isya bugolofu, nu kuti uju asobile apeeligwege ulufundo ula lukalondigwa. Kunongwa iji munangiisye ukuti mukaja na kababye nakamo.

¹² Po nalinga naabasimbiile kalata jula, ngaasimbile kunongwa jaa mundu uju antuliile inongwa ujungi, pamo uju abombeliigwe ububiibi. Looli naalondaga musibone nkyeni mwa Kyala isi mukwijwula ukutubombela kanunu.

¹³ Kuli isyo mutusubiisye. Pamopeene na isi, Tiiti aatuhobwisye nu lusekelo, ula aali nalo ukukongana na muno mwalinsubikiisye.

14 Une naabatuufiifye fiijo nkyeni mmyake, na nuumwe mukangosya isoni. Syosa isi twababuułaga syali sya nalooli. Bo sili, na isi twabatuufiifye umwe kwa Tiiti, syosa sinangi- isye ukujja sya nalooli.

15 Uługano lwa Tiiti kumyinu lukukindilila ukongelela, bo ikukambuka ukwitika kwinu mwesa, na muno mwalimmwambiliile nu lwimiko, kang'i nu lutende.

16 Nikusekela fiijo, namanga ngubasuubila loosa, mu mbombo syosa.

8

Ukubatwala abangi ni ndumbula inunu

1 Po baamyitu ndwitiko, tukulonda ukubabwala isya ipyana lya Kyala ili bapeeliigwe abaa mfipanga fya Kyala ifya mu Maketonija.

2 Abiitiki abo baali mu ngubilo ingali na mbulondo, looli baali nu lusekelo fiijo, ulu lwabapelile ukujja bape fiijo ukusoosya utundu twabo.

3 Nikubabwala nikuti, baasoosiisye utundu twingi, ukukinda amaka gaabo. Kang'i baasoosi- isye ku bwigane bwabo,

4 nu kutupyelesya ukuti, boope bajemo mu mbombo ijaa kubatwala abiitiki abalondo abaa ku Jerusalemu.

5 Baatalile taasi ukwininga ku Ntwa, po balinkwininga na kumyitu, ukukongana nu bwigane ubwa Kyala. Tukaasuubilaga bo ulo na panandi!

6 Tiiti aalyandile imbombo jaa kubungaania ifi mwasangulaga bo iisile kumyinu. Po twalimpyeliisye ukuti iise abatuule ukujimaliisya imbombo ijo.

7 Umwe muli bakabi ndi syosa, ndwitiko, nkikungilwa ikya kulumbilila, mmahala, ukwijuula mu mbombo inunu syosa, pamopeene nu lugano lwinu kumyitu. Po mujege bakabi, na mu mbombo iji ijaa kubatuula abangi.

Ukujja ni ndumbula bo ijaa Jesu

8 Apa ngujoba isi, kukaja kokuti ngubafimbilisya, looli ngulonda ukulubona ulugano lwinu linga lwa nalooli, ku njila jaa kubafwanikisya na bangi.

9 Namanga umwe mumeenye muno unywa gwitu Jesu kilisiti aabapeele iipyana. Na paapo aali nkabi, aaliipelile ukujja ndondo kunongwa jinu, ukuti mbulondo bwake, muje bakabi.

10 Ikyinja iki kikindile, umwe mwali baa kwanda ukunangisya inyango jaa kusangula, nu kwanda ukubomba bo ulo. Po une nguti kanunu,

11 ukumaliisya imbombo iji mwalyandile. Bo ulu mwanyonywaga ukwanda imbombo ijo, po ulu munyonywege ukumaliisya, ukukongana na maka giinu.

12 Po linga umundu ikusoosya ku bwigane bwake, Kyala aikwambilila kukuti kandu aka umundu ujo abagiile ikusoosya. Atikumela ukuti ongelepo.

13 Inyango jitu, kukaja kokuti umwe mukubilwegwe ni kitwalo ikya kubatuula

abangi, ukuti abeene kijege kipepe, looli ngulonda mufwanege itolo.

¹⁴ Akabalilo aka bo muli nu tundu utwingi, mubatuulege aba bakaja nato, ukuti boope akabalilo aka bikwisa kaja nato twingi, bikwisa kubatuulaga umwe. Kuli isyo mukufwanaga,

¹⁵ bo muno sisimbiigwe mwa Kalata uMwikemo ukuti, “Uju aabungeenie twingi, akaali nato utwa kukindapo, uju aabungeenie tanandi akaalyagiilwe.”*

Tiiti na banine bikutumigwa ku Kolinti

¹⁶ Nguntuufya Kyala uju ampeelee Tiiti indumbula iji ndi najo une, ijaa kubatuula umwe.

¹⁷ Namanga bo tunsuumile ukuti iise kumyinu, aaliitiike. Kakaja kokuti aaliitiike itolo, looli umwene ikunyonywa fiijo ukwisa ku bwigane bwake jujo.

¹⁸ Pamopeene nagwe, tukantuma nu gwamyitu ujungi, uju ifipanga fyosa ifya Kyala fikumpa ulwimiko mu mbombo ijaa kafumusya iNdami iNunu.

¹⁹ Kangi ifipanga ifya Kyala finsalile ugwamyitu ujo, ukuti aje pamopeene na nuuswe bo tukutwala ku Jelusalemu ifya kubatuula aband. Imbombo ijo, jikwisa kuntuufya Kyala, kangi jikwisa kunangisya ukunyonywa kwitu ukubatuula abangi.

²⁰ Tukwenda injila pamopeene paapo tukiiigana ukujobigwa ububiibi nu munda,

* **8:15 8:15** Bala kalata gwa Ukusooka 16:18.

kunongwa jaa kwimilila ukutwala utundu, utu abandũ basoosiisye ku booloolo bwabo.

²¹ Inyango jiiu, tukulonda ukubomba kanunu nkyeni mwa Kyala na nkyeni mmbandũ.

²² Po pamopeene na baa Tiiti, tukuntũma ugwamyitu ujungi. Ujo tummbwene kaa kingi, ukuti ikunyonywa ukutuula. Kangi aka-balilo aka ikunyonywa fiijo ukubatũla, paapo ikubasũbila fiijo umwe.

²³ Po linga umundu ikulonda ukusyagania isya Tiiti, umwene mbombeli mwiniitu nkubabombela umwe. Kangi linga ikulonda ukusyagania isya baamyitu bala abangi, abeene batumiigwe ni fipanga fya Kyala, boope bikũmpa ubũsisya Kilisiti.

²⁴ Po leelo, mubanangisye abandũ abo ulugano lwinu, ukuti abiitiki abaa mfipanga fyosa ifya Kyala basyaganie, ukuti mubagiisye ukutuufigwa na nuuswe.

9

Ubutũuli ku biitiki abaa ku Jelusalemu

¹ Po ndikulondigwa ukubasimbila isya butũuli bwinu ubo ku biitiki abaa ku Jelusalemu.

² Namanga njimeenye indumbula jĩnu ijaa kubatũla abangi. Na niine nikwituukifya umwe ku biitiki abaa mu Maketonija ukuti, umwe mwe baa nkipanga kya Kyala ikya mu Akaja mwaliitendekiisye ukusoosya, ukufuma nkyinja iki kikiindile. Ku ndumbula jĩnu ijaa kusoosya, mubapelile abandũ bingi pakati pamyabo ukunyonywa ukusoosya.

³ Po ngubatuma abaamyitu aba, baa Titi. Ngubalonda mwitendekesye, bo muno naababwuliile abiiitiki abaa mu Maketonija, ukuti isi twabatuufyaga umwe, silingaboneka ukuti twabatuufyaga itolo.

⁴ Looli linga niisile uko pamopeene na Bamaketonija bamo, na kwaga mukiitendekesya, apo bo mungosiisye isoni, kunongwa jaa lusubilo lwitu kumyinu. Kangi na nuumwe aamukusuka fiijo.

⁵ Jo nongwa iji naagile kanunu ukubasuma abaamyitu aba, batalepo uko, ukuti baten-dekesye utundu utu mwafingile ukusoosya. Apo bo musoosiisye ni ndumbula inyeelu, kisita kufimbilisigwa.

Ukusoosya iikemo ni ndumbula inyeelu

⁶ Mukambukege ukuti, "Umundu ujū ikusopa finandi, ikutondola finandi, kangi ujū ikusopa fingi, ikutondola fingi."

⁷ Umundu gwesa asoosyege ifi atumwile mu ndumbula jaake. Aleke ukusoosya ku busulumanie na kufimbilisigwa, paapo Kyala annganile umundu ujū ikusoosya ni ndumbula inyeelu.

⁸ Po Kyala abagiile ukubiisusya iipyana lyake ku bwingi fiijo, ukuti akabalilo koosa mujege na tundu toosa utu mukulonda mbwami bwinu, kangi ukuti mujege na maka mingi agaa kubomba imbombo inunu.

⁹ Bo muno sisimbiigwe mwa Kalata uMwikemo ukuti,
"Asoosiisye ni ndumbula joosa, ukubapa abalondo,

ubugolofu bwake bwa bwila na bwila.”*

¹⁰ Kyala jo ujū ikūmpa umundu imbeju isya kubyala, ni kisyese ikya kulya, aikongelapo ukubapa imbeju isya kubyala nu kusibaasya mu ngunda. Kokuti aikubapa nu kubongelapo indumbula ijaa booloolo.

¹¹ Ikubapaga ukubabi ndi syosa, ukuti mujege booloolo akabalilo koosa. Kuli isyo abandu bikuntuufyaga Kyala kunongwa jaa tundu utu mukusoosya ukwendela kumyitu.

¹² Imbombo iji mukubomba, jitikubatuulaga beene itolo abiitiki aba baagiilwe, looli jikubapelaga abandu bingi ukunngwila ulupi fiijo Kyala.

¹³ Imbombo ijo jikunangisyaga ubupe bwinu, kangi abandu bikuntuufyaga Kyala paapo umwe mukujitika iNdami iNunu ijaa Kilisiti nu kukonga imanyisyo syake. Kangi bikuntuufyaga Kyala kunongwa jaa booloolo bwinu ubwa buliilanisi nabo, na bangi boosa.

¹⁴ Po bikubasuumilaga kwa Kyala ni ndumbula joosa, kunongwa jaa ipyana ili abapeele umwe ku bwingi.

¹⁵ Kyala atuufigwege fiijo ku kikungilwa kyake ikikulumba, iki kisikindile induufyo syosa!

10

Pauli ikubaamula aba bikummwilaamwa

¹ Po une Pauli, ne mukuti ndi mooloolo bo ndi pamopeene na nuumwe, looli ndi nkali bo ndi

* **9:9 9:9** Bala kalata gwa Isabuli 112:9.

pabutali na nuumwe, ngubapyelesya ku lwijiisyo na ku booloolo bwa Kilisiti, mumbilikisyege!

² Bamo pakati pamyinu bikuti uswe tukukonga isya pakiisu apa. Bo niisile kumyinu, anguja nkali fiijo ku bandu bala, looli muleke ukumbiika ukuja nkali kumyinu koope.

³ Nalinga tukutugala pakiisu apa, tutikulwa ubwite bo ulwa bandu abaa pakiisu.

⁴ Ifilwilo ifi tukulwila ubwite ubo fikaja fya pakiisu, looli fili na maka agaa kufuma kwa Kyala, fikoonanga amalinga goosa agaa nduga.

⁵ Tukoonanga amasyu goosa agaa matingo aga gikubasigila abandu ukummanya Kyala. Kangi tukusikola inyiinogono syosa ukuti sintiilege Kilisiti.

⁶ Bo munangiisye pabwelu ukuti mukubwimika ubulongosi bwitu, aatukwitendekesya ukubalanga aba bikwendelela ukukaana.

⁷ Namukeete ifi fili nkyeni mmyinu.* Umundu gwesa uju ikwibona ukuti umwene gwa Kilisiti, asyaganiege ukuti na nuuswe tui bandu baa Kilisiti bo umwene.

⁸ Pamo ngiisiisyeipo panandi ukwituufya isya bulagili ubu uNtwa Jesu atupeelee, poope ndikuja ni soni, namanga aatupeelee ubulagili ubo ukuti tubakasye, somma ukuboonanga.

⁹ Ngabingilila ukubatiilisya na baakalata aba ngubasimbila.

* **10:7 10:7** *Namukeete ifi fili nkyeni mmyinu Abimbi abangi bikusanusya amasyu aga ukuti, Umwe mukukeeta syene isya panja.*

10 Paapo bamo bikuti, “Baakalata baa Pauli bali na masyu amakali, kangi masito. Looli bo ali na nuuswe atikuja na maka, kangi amasyu gaake gaa itolo.”

11 Po umundu uju ikujoba bo ulo, asyaganiege ukuti isi tukubasimbila bo tuli kubutali, syo isi aatukusibombaga bo tuli na nuumwe.

Ukwituufya ku mbombo jaa Ntwa

12 Tutikwinogona ukwibiika pamo ukwifwanikisya na bandu bala aba bikwituufya. Bakonyofu bala! Bikwifwanikisya nu kwipima ni fipimilo fyabo abeene.

13 Aatutikwituufya ku mbombo isi babombile abandu abangi, looli tubagiisye ukwituufya ku mbombo isi atupeele Kyala ukusibomba. Imbombo iji jifikile na kumyinu.

14 Nalooli, twali jo uswe twe twali baa kwanda ukubatwalila umwe indumi inunu ijaa Kilisiti. Linga sikaali bo ulo, amasyu giitu aga, ngali gaa kwituufya fiijo.

15 Kangi tutikwituufya ku mbombo isya bandu abangi, isi uswe tukaasibombile. Looli tukusubila ukuti bo ulwitiko lwinu lukongelela ukukula, po imbombo jitu pakati pamyinu jikongelelaga fiijo.

16 Apo po aatukufumusyaga indumi inunu mfiisu ifingi, kuno indumi ijo jikafumusigwa. Namanga tukiigana ukwituufya ku mbombo iji jibombiigwe kuno apeeliigwe umundu ujungi.

17 Kalata umwikemo ikuti,
“Umundu gwesa uju ikwituufya,

iituukifyege mu Ntwa.”†

18 Umunda ujũ unNtwa Jesu ikummwitikisya, akaja jo jula ikwituufya, looli ujũ ikatuufigwa nũ Ntwa.

11

Abandu aba bikulumbilila isya butungulu

1 Ngubasũma mufise ilyojo, nalinga ngujoba ngati ndi nkonyofu. Ngubasũma mufise ilyojo!

2 Une mbaganile fiijo, bo ulũ Kyala abaganile, namanga muli bo ulwa ndindwana ujũ akammanyamo sikũ unnyambala, ujũ naalimmwitikiisye ukwegigwa nũ nnyambala jũmojwene, ujũ jo Kilisiti.

3 Looli lilino ngũtiila ukũti, bo ulwa Efwa muno aasyobiigwe ni njoka jila ingomu, na nuumwe mulingiisa kũsyobigwa, ukũbũleka ubũgolofu nũ lugano lwinu ulwa nalooli kwa Kilisiti.

4 Ngujoba bo ulo paapo umwe muli bengo ukummwambilila umunda ujũ ikwisa kukũmfumusya Jesu ujũngi, ujũ uswe tũkaalimfumwisye. Kangi muli bengo ukummwambilila mbepo ujũngi, pamo indũmi ijingi, ifi mukaalyambiliile ukũfuma kũmyitũ.

5 Une kukaja kokũti ndi nnandi ukũbakinda aba bikwibona ukũja, “Batũmigwa bakũlumba.”*

6 Nalinga sya nalooli ukũti une ngamanya ukũlumbilila kanunu nkyeni nkilũndilo ikya

† 10:17 10:17 Bala kalata gwa Jelemija 9:24.

* 11:5 11:5

Abatũmigwa Bala kũ isyakulingaania.

bandu, poope ngaagilwa ubumanyi. Nnangiisye isyo kumyinu akabalilo koosa ku njila syosa.

Abandu abo batumigwa baa butungulu

⁷ Naaliijiisye ukufumusya kumyinu iNdami iNunu ijaa Kyala, kisita kuhombigwa, ukuti umwe mwineligwe. Bule, naabombile kabiibi ukwijiisya?

⁸ Bo ngubomba imbombo kumyinu, nambililaga ifya butuuli ukufuma ku fipanga ifya Kyala ifingi. Naafwene ngati ngupoka utundu twabo, ukuti mbatuule umwe.

⁹ Akabalilo ako linga naagiilwe fimo, ngaa-bataamiisepo, paapo abiiitiki biiniitu abaa mu Maketonija baalimbeele ifi ngulonda. Niiti-imagi ukuti ndingabatwalila umwe ubatolwe na panandi. Ndikwisa kubatwalilamo ubatolwe siku!

¹⁰ Ubwanalooli bwa Kilisiti bo ulu bujiliile nkati mmyangu, akajako umundu najumo nt-waja toosa utwa mu Akaja, ujū abagiile ukusigila ukwituufya kuli isi.

¹¹ Bule, ngabagana? Kyala ameenye ukuti mbaganile.

¹² Ngwendelelaga ukubomba bo ulu ngubomba lilino, ukuti abatumigwa abo aba bikwibona bakulumba, batoligwe ifya kwituukifya ukuti bikubomba imbombo bo ijiitu.

¹³ Abandu bo abo, batumigwa baa butungulu, bo babombeli abasyobi, bikwibiika ukuja ngati batumigwa baa Kilisiti.

14 Ndi isyo tutikuswiga, paapo joope Seetano ikwibiika ngati gwandami gwa lumuli.

15 Po leelo tutikuswiga apa boope ababombeli baake bikwibiika ukaja ngati babombeli bagolofu. Ummalikisyo gwabo aabikwambilila isi sifwene ni mbombo jaabo.

Paali ikwituufya ku ngubilo syake

16 Ngujoba kangi, umundu alingiinogonaga ukuti une ndi nkonyofu! Looli nalinga mukunjoba ukuti ndi nkonyofu, muundeke nje nkonyofu, mumbilikisye, ukuti na niine niituu-fyepo panandi.

17 Amasyu aga ndi pakujoba ulu, gakaja go aga aaliindagiile uNtwa Jesu, looli ukwituufya uku ngujoba bo ulwa mundu unkonyofu itolo.

18 Paapo bingi bikwituufya ku mbombo sya pakisu apa, na niine ngwituufya.

19 Umwe mukwibona muli na mahala! Looli mutikupaasya, mukubiitikila abandu abakonyofu!

20 Nalooli, mukuumilila nu kummwitika nu mundu uju ikubabiika mbutumwa! Pamo umundu uju ikubiibila nu kupoka utundu twinu! Pamo umundu uju ikukabilamo kumyinu, pamo ikubatuka nu kubakoma kumaaso!

21 Sikungola isoni ukujoba, po uswe twali boonywa ukabomba isyo!

Paali ikwituufya ku boonywa bwake

Linga aliko umundu uju abagiisye ukwituufya ndi simo, na niine mbagiisye ukwituufya, looli ndi pakujoba bo ulwa mundu unkonyofu muno ikajobela!

²² Bule, abeene bikwituufya ukuti Bahibuli? Na niine ndi Nhibuli. Bule, bikwituufya ukuti Banyaisilaili? Na niine ndi Mwisilaili. Bule, bikwituufya ukuti baa ndujungu lwa Abulahamu? Na niine ndi gwa ndujungu lwa Abulahamu.

²³ Bule, abeene bikwituufya ukuti babombeli baa Kilisiti? Une ndi mbombeli gwa Kilisiti ukubakinda abeene! Une nijualile ukubomba imbombo ukukindapo. Mbinyiigwemo mu nnyololo kaa kingi ukukindapo. Ngomiigwemo fiijo, kangi ndi mbutolwe ubwa kufwa kaa kingi, ukubakinda abeene. Ulu ndi pakujoba bo ulwa mundu ugwa kigili.

²⁴ Kahaano ngomiigwe ifingoti 39 na Bajuuta.

²⁵ Katatu ngomiigwe ingili sya Balooma, kamo nduunyiigwe na mabwe, katatu isitima jinyoonangikiile, kangi iisiku limo naakupwike, naali mu nyanja pakilo na pamuusi.

²⁶ Injila nyingi isi nendaga, naali mbutolwe ubwa kuloboka inyiisi isi siiswile, mbutolwe ubwa kukoligwa ni minyambuta, mbutolwe ubwa kukomigwa na Bajuuta biinangu, nu kukomigwa na bapanja. Naali mbutolwe ntwaya na mmatengele, mbutolwe ubwa kwenda mu nyanja, na mbutolwe ubwa ngubilo isya bandu aba bikwibiika ukuya biitiki biiniitu.

²⁷ Mbombile imbombo ingafu nu kutaamigwa, kingi ngonile maaso, ndaamiigwe ni njala ni kyamilwa, kaa kingi ngalyamo ifindu, nu kutugala mu mbepo kisita myenda.

²⁸ Pamopeene na isyo syosa, kukuti isiku ndi ni kitwalo ikya kwimilila ifipanga fya Kyala fyosa.

²⁹ Linga umundu gwesa moonywa, niine ng-wipilika uboonywa. Linga jumo bampelile ukugwila mbatulanongwa, une ngusulumania.

³⁰ Linga ngulondigwa ukwituufya, ngwituufya ku boonywa bwangu.

³¹ Kyala, uGwise gwa Ntwa Jesu, uju ikulondigwa ukutuufigwa bwila na bwila, ameenye ukuti ndikujoba isya batungulu.

³² Akabalilo aka naali mu Ndamasika, undongosi uju aasaliigwe nu malafyale Aleta, aabikile abalindilili mfipata fya kaaja, ukuti bangole.

³³ Leelo abandū bamo baaliisulwisye nkiibo pi itulo lya imato, naaponile ukukoligwa.†

12

Ifisetuka nu boonywa bwa Pauli

¹ Ngulondigwa ukwituufya, nalinga ndikukaba nafimo. Po ulu mpaka njobe isya fisetuka* na isi aasetuliile uNtwa Jesu.

² Nummeenye umundu jumo, uNkilisiti,† uju ifyinja kalongo na fina fikindile, aafyusiigwe mpaka kumwanya fiijo.‡ Ngamanya ukuti aali mu mbili, pamo akaali mu mbili bo ikufyusigwa, looli Kyala jo uju ameenye.

³⁻⁴ Mmeenye ukuti umundu ujo aafyusiigwe mpaka ukufika kula kumwanya, looli ngamanya

† **11:33 11:32-33** Bala kalata gwa Imbombo sya Batumigwa 9:23-25. * **12:1 12:1** Isya fisetuka Bala iisyu **Ubusetuka**

ku Isyakulingaania. † **12:2 12:2** Nummeenye umundu jumo, uNkilisiti Apa Pauli ikwijoba, leelo ikujoba ngati ikunnjoba umundu ujungi. ‡ **12:2 12:2** Kumwanya fiijo NKigiliki bikuti Kumwanya ukwa butatu.

ukuti pamo aafyusiigwe bo aali mu mbili, pamo akaali mu mbili, looli Kyala jo ujũ ameenye. Uko alinkupilika amasyũ agaa kuswigisya fiijo, aga umundu akiitikisigwa ukugajoba.

⁵ Po ulũ angwituufya ku mundũ ujõ, leelo ndik-wituufya muno njĩilile une, looli ngwituufya ku boonywa bwangũ.

⁶ Poope nalinga naalondaga ukwituufya, ngaajaga nkonyofu, paapo ngali ngujoba isya bwanalooli. Looli ngwisigila ukwituufya, ukuti umundu angaanyiinogonelaga ukũkinda isi ngubomba na isi ngujoba.

⁷ Leelo ukuti ndingiituufyaga fiijo kunongwa jaa isi uNtwa Jesu aasetuliile, naapeeliigwe ingubilo ingali mu mbili gwangũ, bo ulwa mwifwa. Gufwene bo ulwa gwandũmi gwa Seetano ujũ atumiigwe, ukuti angufyege nu kũsigila ukũkindilila ukwituufya.

⁸ Katatũ naapyeliisye ku Ntwa, ukuti amboke mu ngubilo isyo.

⁹ Looli umwene aaliimbũlile aatile, “Ipyana lyangũ likufwene, namanga mboonywa mo muno amaka gangũ gikuboneka.” Ndi ilyo, ngwituufyaga nu kubusekela fiijo uboonywa bwangũ, ukuti amaka gaa Kilisiti gaboneke mmyangũ.

¹⁰ Po ndi nu lusekelo mboonywa bwangũ, nkutukigwa, mbutolwe, mu ngubilo nu kutaamigwa, kunongwa jaa Kilisiti. Namanga apa ngũja moonywa, po apa ngũja na maka.

Paũli ikwijajaja kunongwa jaa kajĩilo akaa Bakolinti

11 Ngujoba ngati ndi nkonyofu, looli umwe muufimbiliisye ukubomba bo ulo. Jo umwe mwalondigwaga ukunduufya une, paapo nalinga nguboneka ukusita kubagisya, une ngaja ntumigwa unnandi ukubakinda bala, aba mukuti bo, “Batumigwa abakulumba.”

12 Bo ndi kumyinu, naalyumiliile ukubomba ifika ni fimanyilo ifi fikunangisya ukuti une ndi ntumigwa gwa bwanalooli.

13 Namanga fyo filiku ifi mwalyagiilwe ukukinda ifipanga fya Kyala ifingi? Kaaliko akandu kamokeene itolo aka mwalyagiilwe, akaa kuhomba umfwalo gwangu! Ndaga fiijo ku butolwe ubu! Muuswege!

14 Ulu ngwitendekesya ukwisa kumyinu ulwa butatu, ndikwisa kubatimbikilaga. Ndikulonda ifyinu, looli ngubalonda umwe. Abaana batikulondigwa ukubabikila utundu abapaapi baabo, looli abapaapi bikulondigwa ukubabikila ikyuma abaanaabo.

15 Une ndi nu lusekelo ukusoosya utundu twangu toosa, kangu ukwininga, ukubatuula umwe. Linga ngukiisya ukubagana bo ulu, kali, ulugano lwinu lukunaganikaga?

16 Nalinga mwitiike ukuti ngaabatimbikiile, leelo bamo pakati pamyinu bikuti, “Pauli nkomu, abaagile ku busyobi.”

17 Bale, naalintumilepo umundu kumyinu ujua aabasyobile nu kwegu utundu twinu? Akajako najumo!

18 Naalinkaseenie Tiiti ukwisa kumyinu, pamopeene nu gwamyitu ujungi jula. Bale,

Tiiti aalyegilepo kamo kumyinu? Keeta une nu mwene tuli ndumbula jimojeene mu mbombo, kangi akajiilo kiitu kali kamokeene!

¹⁹ Pamo mukwinogona ukuti akabalilo koosa aka, tukwinosya. Himma! Tukujoba nkyeni mwa Kyala, twe bandu baa Kilisiti. Bakundwe, syosa isi tukubomba sya kubatwala umwe.

²⁰ Ngupaasya bo mfikile kumyinu, ukubaaga na kajiilo aka ngakagana une. Kangi akajiilo kangu katikwisa kubahobosya umwe. Ngupaasya ukubaaga nu bwite, ubwafi, ilyojo nu kusita kupaasya abangi. Aakukuja nu kutungulupilanila, ukuheehana, amatingo nu kutapukana.

²¹ Kangi ngupaasya ukuti bo mfikile kumyinu, Kyala gwangu aikuswasya nkyeni mmyinu. Ngwisa kusulumania ukubaaga abandu bingi pakati pamyinu aba baabobile ubutulonongwa kubwandilo, bakasuma uluhobokelo. Bakaali bali na kajiilo akabiibi akaa bulogwe ni finyonyo ifibiibi ifi baabombaga.

13

Isya kumalikisya ukubasoka

¹ Ulu lukujaga lwa butatu ukwisako kumyinu. Kalata uMwikemo ikuti, "Bajepo abakeeti babili pamo batatu abaa kosisimikisya kukuti kandu."*

² Po bo ndi kumyinu ulwa bubili, naabasokile mwesa, ukuti mubuleke ubutulonongwa bwinu, fiijo aba bendelelaga na kajiilo kaabo akabiibi.

* **13:1 13:1** Bala kalata gwa Ukukumbuka Ingomeelesyo 19:15.

Ɖlũ bo ndi kubutali, ngubasoka kangi. Bo mfikile kumyinu, ndikwisa kubapaakisya abandu bala.

³ Mukulonda ikimanyilo ikya Kilisiti ukujoba ukwendela mmyangu. Po isi mbombile kikuja kimanyilo. Kilisiti akaja moonywa kumyinu, looli ali na maka fiijo pakati pamyinu.

⁴ Kilisiti aali moonywa bo ikukomeleligwa pa kikohekano, looli akabalilo aka muumi mmaka gaa Kyala. Bubũbo na nuuswe tũli boonywa mwa Kilisiti, looli mmaka gaa Kyala tukujaga bũmi pamopeene na Kilisiti, ukuti tubabombelege.

⁵ Po amwijeeneesye jujuumwe, ukuti mumanye linga ulwitiko lwinu lwa nalooli. Mwi-jeeneesye kanunu. Bũle, mukamanya ukuti Jesu Kilisiti alimo nkati mmyinu? Linga akaja nkati mmyinu, po mutoliigwe.

⁶ Looli ngusuũbila ukuti umwe aamukusyagania ukuti uswe tukatoligwa.

⁷ Tukunsũma Kyala ukuti mulingabombapo ubutulanongwa nabũmo. Kukaja kokuti tukulonda ukuboneka ukuja bandũ baa kwimikigwa, looli tukulonda umwe mubombege syene inunu, nalinga abandu abangi bikwinogona ukuti tutoliigwe.

⁸ Namanga tukaja na maka agaa kubusigila ubwanalooli, looli ukubulwila.

⁹ Tukuhoboka bo muli na maka, nalinga uswe tũli boonywa. Tukunsũma Kyala abatũle, mukake ndwitiko.

¹⁰ Ngubasimbila amasyũ aga akabalilo aka, bo ngaali ukwisa, ukuti bo mfikile kumyinu, ndingasyaga isya kumbela ukuja nkali. ƉNtwa

Jesu ambeelee ubulagili ubu, ukubajenga nd-witiko, somma ukubagwisya.

Amasyu agaa kulagana

¹¹ Po baamyitu, musekelege. Mwime kanunu, amasyu gangu gabakasyege, mujege kandu kamokeene, mujege nu lutengaano. Po Kyala ugwa lugano nu lutengaano ikujaga pamopeene na nuumwe.

¹² Namuponaniege ku lugano lwa Kilisiti.

¹³ Abiitiki boosa aba bali pamopeene na nu-uswe, bikubaponia.

¹⁴ Hliipyana lya Ntwa Jesu Kilisiti nu lugano lwa Kyala, nu buliilanisi bwa Mbepo Mwikemo, fijege pamopeene na nuumwe mwesa.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

14ff4521-53e4-562c-aacb-6f4faf55a6c8